



Broj: 03/1-50-14-7-6/23

Sarajevo, 3.10. 2023.

**ČLANOVIMA ZAJEDNIČKE KOMISIJE ZA ODBRANU I SIGURNOST BiH:**

**JASMINU IMAMOVIĆU, MARINI PENDEŠ, RADOVANU KOVAČEVIĆU, DARKU BABALJU, MILANU DUNOVIĆU, SLAVKU MATIĆU, SANJI VULIĆ, ŠERIFU ŠPAGI, KEMALU ADEMOVIĆU, SREDOJU NOVIĆU, ZDENKU ĆOSIĆU, SAFETU SOFTIĆU**

**PREDMET:** Informacija o učešću u radu Parlamentarnog foruma o malom i lakom naoružanju članica Zajedničke komisije za odbranu i sigurnost BiH Marine Pendeš i Sanje Vulić, 21.-22.6.2023.

Zamjenica predsjedavajućeg Zajedničke komisije za odbranu i sigurnost BiH Marina Pendeš i članica Zajedničke komisije Sanja Vulić učestvovala su u radu Parlamentarnog foruma o malom i lakom naoružanju koji je 21. i 22.6.2023.godine održan u Tirani.

Parlamentarni forum pod nazivom „Jačanje parlamentarne svijesti i aktivnosti za mirnija i održivo razvijena društva - provođenje Mape puta za održivo rješavanje i suzbijanje nedozvoljenog posjedovanja, zloupotrebe i trgovine malokalibarskim oružjem i lakim naoružanjem i pripadajućom municijom na Zapadnom Balkanu” svojim uvodnim izlaganjima su otvorili član Komiteta za nacionalnu sigurnost Parlamenta Albanije Bardhyl Kollcaku, šefica Centra za kontrolu malokalibarskog i lakog naoružanja u Jugoistočnoj Evropi Bojana Balon i generalna sekretarka Parlamentarnog foruma o malokalibarskom i lakom oružju Karin Olofson.

U prvom dijelu Parlamentarnog foruma razgovaralo se o potrebi unapređenja parlamentarnog znanja o Mapi puta za zemlje Zapadnog Balkana, te o potrebi njene sinergije sa ostalim relevantnim međunarodnim instrumentima i obavezama koje se odnose na kontrolu naoružanja. Preventivno djelovanje, borba za iskorjenjivanje trgovine malokalibarskim oružjem, posebno u svjetlu nedavnih događanja u školskim ustanovama u zemljama Zapadnog Balkana, pokazali su da, kako je naglašeno, predstavnici zakonodavne i izvršne vlasti trebaju bez odlaganja djelovati.

U svom obraćanju učesnicima Parlamentarnog foruma zamjenica predsjedavajućeg Zajedničke komisije za odbranu i sigurnost BiH Marina Pendeš prezentirala je aktivnosti koje Zajednička komisija preduzima s ciljem poboljšanja implementacije Mape puta. Posebno je naglasila značaj usklađivanja zakona o oružju, značaj podrške projektu za sprečavanje ilegalne trgovine i prometa oružjem u Bosni Hercegovini, te je kod predstavnika međunarodnih organizacija i njihovih eksperata insistirala na dostavljanju informacija o rezultatima regionalne kampanje u vezi s implementacijom projekata koje realiziraju na Zapadnom Balkanu. Naglasila je i značaj podrške radu Koordinacionog odbora za SALW Vijeća ministara BiH, te izražene spremnosti da se nastavi sa aktivnostima zbrinjavanja

neispravne i nesigurne municije i minsko-eksplozivnih sredstava, a sve s ciljem izgradnje sigurnog i stabilnog okruženja.

U radu Parlamentarnog foruma, pored predstavnika komisija za odbranu i sigurnost parlamenata zemalja Zapadnog Balkana, učestvovali su i predstavnici ministarstava, agencija iz sektora sigurnosti, te ekperti međunarodnih organizacija koji prate i neposredno saraduju na implementaciji Mape puta.

Tokom drugog dana Parlamentarnog foruma raspravljalo se o usklađivanju zakonodavnog okvira sa regulatornim okvirom Evropske unije (EU) i drugim relevantnim međunarodnim obavezama, uključujući i uvođenje rodne ravnopravnosti iz Mape puta za kontrolu malog oružja i lakog naoružanja u zemljama Zapadnog Balkana, odnosno veće zastupljenosti žena na političkim pozicijama na kojima se donese odluke.

Zamjenica predsjedavajućeg Zajedničke komisije Marina Pendeš prezentirala je stanje po pitanju integriranja rodne ravnopravnosti u pravni i politički okvir o kontroli malokalibarskog oružja u Bosni i Hercegovini. Naglasila je potrebu uključivanja rodne perspektive u zakonodavstvo koje regulira pitanje kontrole malog oružja i lakog naoružanja, te je iznijela i glavne izazove i mogućnosti u vezi sa usklađivanjem pravnog okvira u Bosni i Hercegovini sa regulatornim okvirom EU i drugim međunarodnim instrumentima.

Pendeš je organizatorima Parlamentarnog foruma sugerirala da urade uporedne analize rodne zastupljenosti i ravnopravnosti u sektorima odbrane i sigurnosti u zemljama Zapadnog Balkana sa drugim regionima, kao što su skandinavske i baltičke zemlje, s ciljem da se urade preporuke koje će se koristiti u usklađivanju pravnog okvira u ovoj oblasti sa propisima EU i drugim međunarodnim instrumentima.

Zamjenica predsjedavajućeg Zajedničke komisije za odbranu i sigurnost BiH Marina Pendeš i članica Zajedničke komisije Sanja Vulić razgovarale su, na marginama Parlamentarnog foruma o malom i lakom naoružanju u Tirani, sa zamjenikom predsjednika Odbora za odbranu i unutrašnje poslove Narodne skupštine Republike Srbije Aleksandrom Markovićem i članovima delegacije Republike Srbije.

Tokom susreta razmijenjena su mišljenja o temama o kojima se razgovaralo tokom Parlamentarnog foruma. Posebno se razgovaralo o mogućnostima unapređenja parlamentarnog znanja o Mapi puta za zemlje Zapadnog Balkana i obavezama koje se odnose na kontrolu naoružanja.

Sagovornici su konstatirali da je potrebno podržati Program Ujedinjenih naroda namijenjen preventivnom djelovanju, borbi i iskorjenjivanju trgovine malokalibarskim oružjem i lakim naoružanjem. Isto tako, u svjetlu nedavnih događaja u školama u Srbiji i Bosni i Hercegovini, razmijenjene su informacije oko implementacije akcionih planova za održivo suzbijanje nedozvoljenog posjedovanja, zloupotrebe i trgovine malim oružjem i lakim naoružanjem i pripadajućom municijom.

Razgovarano je i o mogućnostima za organizaciju susreta dvije komisije, što su obje delegacije podržale. Ocijenjeno je da bi organizacija takvog susreta bila dodatni impuls u daljem unapređenju bilateralnih odnosa, boljem međusobnom razumijevanju i razmjeni pozitivnih praksi i rješenja u oblastima o kojima se razgovaralo tokom Parlamentarnog foruma u Tirani.

Zamjenica Predsjedavajućeg

**Marina Pendeš**